




**XUNTA DE GALICIA**  
CONSELLERÍA DO MEDIO RURAL  
Dirección Xeral de Gandaría, Agricultura  
e Industrias Agroalimentarias

Edificio Administrativo San Caetano  
15781 Santiago de Compostela  
<http://mediorural.xunta.es>



**XUNTA DE GALICIA** Saída 273 / RX 21144

Registro Xeral da Xunta de Galicia  
SANTIAGO DE COMPOSTELA

Data 11/01/2021 10:16:59



José Luis Benedito Castellote  
Presidente do Ilustre Colexio Oficial  
de Veterinarios de Lugo  
Ramón y Cajal, 2, 3º  
27001 Lugo

Estimado José Luis,

En relación á súa comunicación de data 3 de decembro de 2020, sobre as medidas de seguridade a aplicar nas actuacións do persoal veterinario nas explotacións, desexo manifestarlle os seguintes extremos:

Resulta evidente que a Consellería do Medio Rural mostra a máxima preocupación por asegurar que as actuacións de todo o persoal veterinario que dela depende, e mesmo daquel outro alleo ás actuacións oficiais, se realicen coa máxima seguridade e garantía, sendo prioritario preservar a súa integridade física, ademais do benestar dos animais.

Como ben coñece, en Galicia existe un gran número de explotacións (só en gando bovino contabilizamos un total de preto de 32.000 en estado de alta e con animais), de moi variada tipoloxía e tamaño, e con moi diversos sistemas de explotación e estado de conservación das instalacións. Aínda que existe un número moi importante de explotacións que contan con instalacións modernas e certamente seguras, é certo que existen outras con estado máis deficiente, nas que moitas veces ademais os propietarios presentan unha idade avanzada, en ocasións sen posibilidade de relevo xeracional. Este feito por unha banda dificulta o manexo do gando, e por outra provoca que estas persoas gandeiras se mostren remisas a realizar inversións para mellorar as instalacións.

A esta variabilidade de tipoloxías e circunstancias das explotacións, súmase o feito de que non exista unha normativa concreta que defina o tipo de instalacións necesarias para un axeitado manexo, e mesmo as discrepancias de valoración do propio persoal veterinario en relación ás condicións dalgunhas delas, xa que chegou a ocorrer nalgunha explotación que mentres para unha persoa veterinaria as instalacións non ofrecían garantías, para outra si que as cumprían.

Neste contexto, a administración da Comunidade Autónoma leva anos convocando axudas para a mellora das explotacións, dotadas con moi importantes créditos orzamentarios, ás que se pode acceder non só respecto a actuacións referidas aos sistemas de produción, senón tamén para desenvolver todas aquelas reformas estruturais que faciliten o manexo do gando e proporcionen as máximas medidas de seguridade nas actuacións que haxa que desenvolver con el (mangas de manexo, cubículos, peches, etc).





Por outra banda, e tal como vostede sinala, e así establece a propia normativa, resulta evidente que a responsabilidade de establecer todos os medios necesarios para que as actuacións sanitarias se desenvolvan coa máxima seguridade e garantía, tanto para o gando como para as persoas profesionais que as executan, recae nas persoas gandeiras. Neste sentido, e respecto á empresa Tragsatec, que vostede menciona no seu escrito, transmitíronse xa fai tempo instrucións para que o persoal veterinario avalíe escrupulosamente en cada caso se as condicións que presentan cada unha das explotacións, e a colaboración das propias persoas gandeiras, presentan as oportunas garantías á hora de efectuar as actuacións, absténdose de actuar en todos os casos nos que consideren que non son óptimas. Estas circunstancias deben comunicarse, a través do oportuno parte de incidencias, aos Servizos Veterinarios Oficiais, para que tomen as correspondentes medidas nas explotacións, que poden incluír o requirimento ás persoas titulares para que poñan todos os medios necesarios para que as actuacións se efectúen con total seguridade, e mesmo a suspensión da cualificación sanitaria ata que estas medidas se adopten e se proceda á revisión do gando.

Ademais desta actuación inmediata dos Servizos Veterinarios Oficiais ante os problemas de manexo comunicados polo persoal veterinario de Tragsatec ao longo da campaña anual de saneamento, e cando remata esta cada ano, dende o Servizo de Sanidade Animal solicítase á empresa a remisión dunha listaxe coa relación de todas as explotacións nas que atoparon dificultades no manexo. Esta listaxe é remitida a cada Servizo provincial de Gandaría para que coordine a comprobación da situación destas explotacións, se é necesario mediante visitas de control oficial, e establecéndose se é preciso un prazo irrevogable para a adecuación das instalacións.

Aínda que se tomen estas medidas, resulta igualmente fundamental que os profesionais veterinarios tomen conciencia da necesidade de tomar todas as precaucións necesarias, de manterse vixiantes e de non confiarse durante o desenvolvemento das actuacións. Debemos ser conscientes de que, aínda que unha explotación presente condicións relativamente seguras e instalacións axeitadas, se traballa con gando, que en calquera momento pode ter reaccións imprevisibles e por en perigo a integridade física das persoas profesionais.

De feito, os desgraciados accidentes que vostede menciona no seu escrito producíronse en explotacións que inicialmente non deberían resultar perigosas. No primeiro dos casos, no que lamentablemente a persoa veterinaria resultou falecida, a explotación contaba con cadeas de suxeición do gando, a persoa titular brindouse a suxeitalo, e a persoa veterinaria coñecía previamente as instalacións. No segundo dos casos que cita, a explotación mesmo contaba con manga de manexo, estaban presentes tres persoas veterinarias, e había catro persoas gandeiras para colaborar na manipulación do gando. Aínda así, os accidentes producíronse, o que indica que resulta fundamental que as persoas profesionais técnicas tomen todas as precaucións necesarias.

En todo caso, e sendo conscientes da necesidade de traballar dende todos os sectores (evidentemente, tamén, e sobre todo, dende a administración) para mellorar as condicións de





seguridade das explotacións, trasladolle o noso firme compromiso para traballar nesa dirección, coas medidas das que dispoñamos, e para asegurar todo o posible a integridade física do gando, das persoas gandeiras e das persoas veterinarias.

Santiago de Compostela,

O director xeral de Gandaría, Agricultura e Industrias Agroalimentarias

Silvestre José Balseiros Guinarte

Asinado dixitalmente



